

Հայ գաղթավայրերի առաջացումը

ՎԱՐԴԳԵՍ ՀԱՄԱԶԱՍՊԵԱՆ

Հայ գաղթավայրերը շատ հին պատմութիւն ունեն։ Մեզ հասած հայ եւ օտար պատմիչների տեղեկութիւններն ու վկայութիւնները ցոյց են տալիս, որ նրանք կազմակերպուել են հայ պետականութեան ձեւաւորման, հզօրացման շրջանում եւ գոյատեւել դարեր շարունակ։

Առաջին հայ գաղթավայրեր ստեղծողները հաւանաբար հայ զինուորական միաւորումներն են եղել, այն միաւորումները, որոնք հայ թագաւորների կողմից ուղարկուել են դաշնակցային կամ վասալական պարտաւորութիւնների կատարման համար։

Օտար երկրներում գտնուող հայ զինուորական միաւորումների մասին տեղեկութիւններ կարելի է գտնել Քսենեֆոնի, Հերոդոտի եւ օտար այլ պատմիչների երկերում։ Դեռ յոյն-պարսկական պատերազմի ժամանակ (408 թ. Ք. Ա.) պարսկական բանակում յոյների ղէմ կուուել է հայկական զօրամաս։ Մանրամասն տեղեկութիւններ են պահպանուել 331 թ. Ք. Ա. Իսոսի ճակատամարտում Մակեդոնացու ղէմ հայկական զօրաբանակների մասնակցութեան, նոյնիսկ հայ կռուող ուժերի թուի ու հրամանատարների մասին։ Իսկ բոլորովին պատմական է, որ՝ «Ալեքսանդրը իր արշաւանքներին ի զուր դիմադրող ժողովուրդներու զօրքերու շարքին գտաւ նաեւ հայերու վաշտերը, Իսոսի ճակատամարտի մէջ (331 թ. Ք. Ա.)։ Ասկէ յետոյ, երբ Ալեքսանդրը Ասորիքը, Եգիպտոսը եւ Բաբելոնը գրաւեց, Ասորեստանի Արբելայի դաշտին մէջ պատերազմ մղեց, նոյն հայերը պարսից կայսրութեան ամենաընտիր ռազմիկներուն հետ միասին կուտակուած էին անոր ղէմ։ Սակայն հայկական զօրքը շատ չէր՝ 4000 հետեւակ եւ 700 հեծեակ» (1)։

1) Ա. Ալպոյանեան, Հայ Գաղթականութեան Պատմութիւն, Ա. հտր., Գահիրէ 1941, էջ 102։

ի հարկէ, հայոց զօրքի թիւը վերաբերում է այս ճակատամարտին միայն, քանզի բազմաթիւ վկայութիւններ կան ե՛ւ Քսենեֆոնի ե՛ւ այլ պատմիչների մօտ, որ հայերը օգնական զօրք էին տալիս պարսիկներին՝ 47.000 հետեւակ եւ 8000 հեծեալ:

«Քսենեֆոնի հաղորդած վերոյիշեալ վկայութիւններից յատուկ ուշադրութեան արժանի է նրա տուած տեղեկութիւնը, որ արմէններն օգնական զօրք էին տալիս Պարսկաստանին՝ 40.000 հետեւակ եւ 8000 հեծելազօր» (2): Մի այլ տեղ Քսենեֆոնը վկայում է, որ հայերը չորս հազար ձիաւոր եւ քսան հազար հետեւակ էին տալիս պարսիկներին, իսկ մի մասը թողնում էին Հայաստանի պաշտպանութեան համար: «Նա նորից արմէնների թաղաւորի հետ բարեկամութիւն է հաստատում եւ պատերազմի համար վերցնում է նրա զօրքի կէսը՝ չորս հազար ձիաւոր եւ քսան հազար հետեւակ: Զօրքի միւս կէսը նա թողնում է երկրում, որովհետեւ արմէնները շարունակ պատերազմ էին մղում հարեւան խալդերի դէմ, որոնք Քսենեֆոնի վէպում անուանուած են Խալդայներ»:

Ակադեմիկ Մանանդեանը վերլուծելով Քսենեֆոնի եւ այլ պատմիչների հաղորդած տարբեր վկայութիւնները, եկել է այն եզրակացութեան, որ Դարեհ Ա.ի եւ նախորդների ժամանակ, արմէնները տալիս էին Պարսկաստանին հետեւակ ու ձիաւոր զօրք: Արմենական օժանդակ այս զօրամասը, ինչպէս կարելի է եզրակացնել աղբիւրների վկայութիւններից, մասնակցել է հաւանօրէն այն բոլոր պատերազմներին, որ վարում էին Դարեհ Ա.ը եւ իր յաջորդները՝ սկիւթացիների, յոյների ու եգիպտացիների դէմ:

Արմէնները յիշատակուած են, օրինակ Քսերքսեսի զօրաբանակի շարքերում, որն արշաւելու էր Յունաստան (480 թ. Ք. Ա.): Հերոդոտը վկայում է, որ այս արշաւանքին մասնակցող արմէնները զինուած են եղել փռիւզիացիների նման եւ վերջիներին հետ դառնուել են Դարեհի փեսայ Արտաքսէսի հրամանատարութեան տակ: Նրանք ունեցել են իրրեւ զէնք ու հանդերձանք՝ հիւսուած սաղաւարտներ, փոքր վահաններ, կարճ նիզակներ, տէգեր, սրեր եւ բարձր ձտքաւոր կօշիկներ:

Հայերի զինուորական ծառայութիւնը աքեմենեան Պարսկաստանում դիտուում էր որպէս ժողովրդի մասնագիտութիւն: Ինչպէս երեւում է, հին աշխարհում, յատկապէս արմէնները մեծ անուն էին հանել իրենց քաջութեամբ, խիզախութեամբ, արագաշարժութեամբ, հաւատարմութեամբ: Այդ նոր ռազմիկ ժողովուրդը յա-

2) Յ. Մանանդեան, Քննական Տեսութիւն Հայ Ժող. Պատմ., Ա. հտր., Երեւան 1944, էջ 83:

ճախ օգտագործուած էր խոշոր պատերազմների, տեղաշարժերի, պաշտպանութեան եւ յարձակումների ժամանակ:

«Հայերը, նոյնպէս Աքեմենեան շրջանին, իրենց երկրէն հեռու վայրեր երթալու հարկադրուած էին զինուորական պատճառներով, վասնզի Հայաստանի բնիկ իշխանները երբ խաղաղութեան մէջ էին սատրապներուն հետ, զինուորական ուժ կը տրամադրէին կամ վարձկան զինուորներ կը հայթայթէին, որոնք իրենց առանձին գունդերով, Արքայից Արքային բանակին արշաւանքներուն կը մասնակցէին» (3), ասում է Ալպոյաճեանը:

Իսկ Մանանդեանը գտնում է, որ հայերը եւ նրանց իշխաններն ու թագաւորները ոչ միայն զօրք ու զօրային միաւորումներ էին տալիս, այլեւ հենց իրենք կազմութեամբ զինուորներ ու զինուորական միաւորումներ էին: «Արմենական համեմատական փոքրաթիւ գաղթականները, բոլորն էլ եղել են հաւանօրէն զինուորներ» (4), եւ այդ զինուորներին անցեալում մեղացիները օգտագործել են օտար ժողովուրդների դէմ՝ որպէս զինուորական գաղթականներ:

Մանանդեանը պաշտպանելով Մարգուարդի յայտնած կարծիքը հայկական զինուորական գաղթավայրերի մասին, ասում է. «Ի նկատի ունենալով արմէնների գրաւած գաղթավայրերի ստրատեգիական բացառիկ կարեւորութիւնը, ինձ թւում է, հաւանական կարելի է համարել, որ արմէնները վերոյիշեալ շրջաններում հաստատուել էին, ինչպէս ուղիղ ենթադրել է Մարգուարդը, իբրեւ մեղացիների դաշնակից գիւնուորական գաղութներ (ընդգծումը իմն է - Վ. Հ.) այս վերջինների համաձայնութեամբ»:

Ինքնըստինքեան հասկանալի է, որ նման եզրակացութիւնները չէին վերաբերում հայկական մշտական գաղթավայրերին: Աւելի շուտ վերաբերում էին այն բարդ շրջաններին, երբ դեռ շարունակուած էր հայ ժողովրդի կազմաւորման ընթացքը երբ հայ արմէնները Վանայ լճի աւազանից շարժուած, տարածուած էին դէպի Արարատեան դաշտը, հայ լեռնաշխարհի բնակիչներին համախմբում իրենց շուրջը, աստիճանաբար հայացնում: Տեղի էր ունենում հայ ժողովրդի կազմաւորումը, վերանում էին նախկին ցեղերն ու ցեղային միութիւնները, եւ իր ամբողջ հասակով հայոց լեռնային կղզում բարձրանում եւ միաձուլուածից ծնւում էր հայ ժողովուրդը: Բերուած փաստերը վկայում են, որ հին դարերում,

3) Ա. Ալպոյաճեան, Հ. Գ. Պ., Ա. հտք., էջ 102:

4) Յ. Մանանդեան, Բ. Տ. Հ. Ժ. Պ., Ա. հտք., էջ 82:

մինչև հայ պետականութեան սկիզբը, այսինքն՝ մինչև Մազնեզիայի ճակատամարտը (190 թ. Ք. Ա.) եւ Արտաշէսեանների հանդէս դալը հայկական դաղթավայրերի ստեղծողները զինուորական միաւորումներ էին:

Մառալութեան մէջ գտնուող զինուորական այդ միաւորումները ժամանակաւոր բնակիչներ կարող էին լինել Պարսկաստանում եւ նրա տիրապետութեան տակ գտնուող երկրներում եւ յաճախ կարող էին փոխել իրենց բնակավայրերը երկրի սահմանների պաշտպանութեան կամ ռազմական գործողութիւնների թելադրանքով: Աւելի կայուն դաղթավայրեր հայերը հաստատում են հայկական պետութեան հզօրացման շրջանում՝ Արտաշէսեան հարստութեան նշանաւոր թագաւորների՝ Տիգրան Երկրորդի եւ Արտաւազդի գահակալութեան տարիներին: Այդ դաղթավայրերը բաւականին երկար կեանք ունեցան եւ յարատեւեցին մինչև Արշակունիներ, նոյնիսկ՝ Բագրատունիները եւ հետագայում դարձան հայերի մշտական բնակավայրեր, հայկական շրջաններ:

Տիգրան Երկրորդի (95-55 թթ.) աշխարհակալ պետութեան սահմանները (Ա. դար, Ք. Ա.) Կովկասեան լեռներից ձգւում էին մինչև Միջին Արեւելք. Տիգրանը արեւմուտքում մի շարք նուաճումներից յետոյ իրեն ենթարկեց Մեծ Մարաստանը, Կապադովկիան, Կորդուքը, Ադիաբենը (Մուսայի շրջան), հասաւ մինչև Նինուէ, Արբելա, հռչակուեց «թագաւոր Ասորւոյ», անցաւ Սելեւկեան թագաւորութեան շրջանները, զբաւեց Միրդոնիան (Մըծքին Ոսրոյեան, Ուհայաստան, Եդեսիա, Ուրֆա), մտաւ դաշտային Կիլիկիա, հասաւ Փիւնիկիա եւ Հրէաստանի սահմանները եւ իր հզօրութեամբ ճանաչուեց ամբողջ արեւելքում որպէս թագաւորների թագաւոր՝ «Արքայից Արքայ»: Հայերն այս շրջանում բնականաբար բնակութիւն էին հաստատում նաեւ այն երկրամասերում, որը նուաճել կամ իրեն էր ենթարկել Տիգրանը՝ Ադուանքում, Վըրաստանում, Ատրպատականում, Կորդուքաց աշխարհում, Միջագետքում, Ասորիքում եւ Միջերկրականի ծովափնեայ քաղաքներում, որոնք այդ ժամանակաշրջանում տնտեսութեան եւ մշակութային համաշխարհային կեդրոններն էին: Հաստատուելով այդ երկրներում, հայ համայնքները տնտեսական - առեւտրական աշխոյժ կապերի մէջ էին մտնում բնիկների եւ հարեւան ժողովուրդների հետ, ծանօթանում օտար երկրների արհեստներին, մշակոյթին եւ իրենց աշխատանքով նպաստում Տիգրանի լայնածաւալ պետութեան եւ նոր երկրների տնտեսութեան զարգացմանը: Ուժեղ պետականութեան պայմաններում հայը օտարութեան մէջ ոչ միայն պանդուխտ եւ անօգնական չէր զգում, այլեւ շատ դէպքերում այդ

երկրները ոտք էր դնում որպէս նուաճող, յաղթող, թիւադրող, ինչպէս Հին դարերում յոյները, հռոմէացիները, ասորիներն ու պարսիկները: Հայ եւ օտար աղբիւրների վկայութեամբ Միջագետքի եւ շրջապատի մի շարք երկրների բաղամթիւ քաղաքներ Հիմնել են հայերը եւ հետագայում գիջել նոր նուաճողներին: Փաւստոս Բիւզանդը Պապ Թադաւորի դիմումներից մէկի միջոցով հաստատում է, որ Ուռհա քաղաքը կառուցուել է մեր նախնիների կողմից, իսկ Կեսարիան եւ 10 քաղաքներ հայկական են եղել. «Եւ Պապ Թադաւորը իր միտքը ծռեց ու սիրաբը շուռ տուեց յունաց Թադաւորից եւ կամեցաւ սէր եւ միասնութիւն հաստատել պարսից Թադաւորի հետ... Յետոյ պատգամաւորներ է ուղարկում յունաց Թադաւորի մօտ, թէ՛ «Կեսարիայի հետ ուրիշ տասը քաղաք մերն են եղել, ետ տուր, Ուռհա քաղաքն էլ մեր նախնիքն են շինել, ուստի եթէ չես ուղում, որ խոտովութիւն ծագի մեր մէջ...» (5): Ինչպէս դժուար չէ հասկանալ, հայերով բնակեցուած եւ նրանց կողմից կառուցուած քաղաքները ետ ստանալու դիմումի ոճից, Պապը բիւզանդական կայսրի հետ խօսում է նաեւ սրպէս հաւասարը հաւասարի եւ ապա հաստատում, որ ինքը կարող է նոյնիսկ զէնքով պաշտպանել իր պետութեան եւ պատկանեալ քաղաքներում բնակւող հայերի շահերը: Պատմիչների վկայութեամբ, Եղեսիան, ինչպէս նաեւ ամբողջ Միջագետքը պատկանել է հայերին եւ Երուանդունիները հետագայում այն գիջել են հռոմէացիներին:

«Յովսէփոս (Հնախօսութիւն Հրէից, ԺԼ. 8) եւ Տակիտոս (Տարեդրութիւն, Բ. 3, Ժ. Կ. 34, 26, ԺԵ. - 1) կը հաստատեն որ հայկական էին Եղեսիա եւ ամբողջ Միջագետք եւ Երուանդ Թադաւոր զանոնք թողած էր հռոմէացիներուն» (6):

Մեծալատակ պատմաբանը բերելով մի շարք տեղեկութիւններ, միաժամանակ ասում է՝ «Եթէ նոյնիսկ ասոնք առասպել ալ եղած ըլլան, անուրանալի է, որ հայերը շատ վաղեմի յարաբերութիւններ ունեցած են Եփրատի արմուկին եւ անոր Միջագետքի դաշտերուն մէջէն անցնող մասերուն եզերքը գտնուող հողերուն հետ: Ոչ մէկ տարակոյս, որ Սելեւկեանց շրջանին՝ Անտիոք եւ շրջակայքը, Արշակունեաց շրջանին՝ Կոմմագենի մէջ հայ գաղութներ կային, որոնք միշտ նոր գաղթականներով ստուարացած են, ինչպէս Եփրատէն արեւմուտք գտնուող բոլոր երկիրներուն, նոյն-

5) Փ. Բիւզանդ, Հայոց Պատմութիւն, Երևան 1947, գլ. ԼԲ., էջ 270:

6) Ա. Ալպոյաճեան, Հայ Գաղթականութեան Պատմութիւն, Բ. հտք., Գահիրէ 1955, էջ 401:

պէս եւ այդ շրջանակին, այսինքն՝ Սուրբոյ Հիւսիսային երկրամասին մէջ: Երբ Մեծն Տիգրան դրաւեց Հիւսիսային Միջագետքի երկու ծաղկեալ նահանգները՝ Միզդոնիա (Մծբին = Նիզիպին) եւ Ոսրոյենա (ՈւռՀայաստան = Եղեոսիա = Ուրֆա), ինչպէս նաեւ Միւրիան՝ մինչեւ Հրէաստանի սահմանները, հայերը յարաբերութիւն սկսան ունենալ այս նահանգներուն հետ» (7):

Հայերը ոչ միայն բնակութիւն էին հաստատում եւ տարածում նուաճած երկրներում, այլեւ իրենց ենթակայ եւ հայ թաղաւորների լծի տակ ընկած ժողովուրդներին զանգուածաբար քշում եւ բնակեցնում էին Հայաստանում: Պատմութիւնից յայտնի է, թէ ինչպէս Տիգրան Բ. իր նուաճումների շրջանում հազարաւոր եւ տասնեակ հազարաւոր հրեաներ ու յոյներ տեղահանեց եւ բերեց բնակեցրեց Տիգրանակերտում եւ Հայաստանի այլ քաղաքներում:

Փէոտալական յարաբերութիւնների զարգացումը եւ Արշակունիների հարստութեան անկումը, արտաքին եւ ներքին ուժերի նոր բախումները ամբողջովին շրջեցին հայ ժողովրդի պատմութեան զարգացման ընթացքը: Նախարարական տները կողմից հայկական ուժեղ կեդրոնաձիգ պետութեան ստեղծման բոլոր փորձերը ձախողուեցին, Հայաստանը դարձաւ նոր բարձրացող ժողովուրդների եւ յարձակող մրցակից պետութիւնների պատերազմների թատերարեմ, որը յաճախ ենթարկւում էր արշաւանքների, աւերումների: Տեղահանողը տեղահանուեց: Օտար նուաճողները հայերին աշխատեցին հեռացնել իրենց բնակավայրերից, քշելով նրանց պարսկական եւ բիւզանդական տիրապետութեան ծայրագաւառները:

Այդ տեսակէտից առանձին հետաքրքրութիւն է ներկայացնում 4-րդ դարը: Պարսից Սասանեանները եւ Բիւզանդական կայսրերը կեղծ բարեկամական, դիւանադիտական, ռազմական եւ այլ ճանապարհներով հետապնդում էին Հայաստանի մասնատումը: Սասանեանների յաղթանակը Պարսկաստանում եւ Արշակունիների գոյութիւնը Հայաստանում չէր կարող խորը թշնամանք չառաջացնել երկու դինաստիաների միջեւ: Այդ թշնամանքը աւելի սրուեց, երբ հայերը հաւատով նոյնպէս հեռացան պարսիկներից: Դինաստիական պայքարին միացաւ եւ հաւատի պայքարը, իսկ հին հաւատը կողմնակիցներ շատ ունէր Հայաստանում: Զրադաշտը իր տեղը հեշտութեամբ չէր զիջում քրիստոնէութեանը: Բախումները ռազմադաշտից տեղափոխուում էին Փէոտալական տները եւ եկեղեցիները:

7) Նայճը:

րը, նախարարների եւ հոգեւորականների շրջանները, այսինքն՝ այն օղակները, որոնք կարող էին յաղթանակ կամ պարտութիւն բերել երկրին: Սասանեանները պարսկասէրների միջոցով, իսկ բիւզանդական կայսրերը բիւզանդասէրների՝ մեծ պայքար են ծաւալում Հայաստանի թագաւորական պալատում, նախարարական դշեակներում ու դերանով թուլացնում երկրի միասնութիւնը: Միասնութեան խախտումը հող էր նախապատրաստում պատերազմական դործողութիւնների համար: Փաւստոսի վկայութեամբ Շապուհ Ներկաբակեացը տասնեակ արշաւանքներ է կազմակերպել Մերուտան Արծրունու եւ Վահան Մամիկոնեանի մասնակցութեամբ Սասանեանների վաղեմի բաղձանքը կատարելու՝ հայ պետականութեանը ոչնչացնելու համար:

Յաճախ կրկնուող պատերազմներն ու արշաւանքները, քաղաքների ու աւանների աւերումը, զանդուածային տեղահանումները եւ ժողովրդին հեռաւոր երկրներ քշելը քայքայում էին երկրի անտեսութիւնը, իսկ նշանաւոր ուժեղ թագաւորներին եւ զօրավարներին խարդախ ճանապարհներով ոչնչացնելը (Արշակ Բ., Վասակ Մամիկոնեան, Պապ, Մուշեղ, եւայլն) թուլացնում էր ժողովրդի բարոյական ոգին:

Հայերի տեղահանումները պարսիկները եւ բիւզանդացիք կատարում էին շատ ծրագրուած եւ մեթոդիկ:

Տեղահանումները աւելի մասսայական բնոյթ էին ստանում պատերազմների ժամանակ, երբ օտարները դրաւում էին հայկական քաղաքներն ու բնակավայրերը: Փաւստոս Բիւզանդի վկայութեամբ, 368 թ.ին Արտաղերսի հերոսական պաշտպանութիւնից յետոյ, երբ ընկաւ Արտաղերսը, եւ պաշտպանութեան կազմակերպիչ Փառանձեմ Թագուհին գերուեց, պարսից յարձակուող բանակները հիմնադատակ քանդեցին հայկական քաղաքներն ու աւանները, տասնեակ հազարաւոր հայերի քշեցին դէպի գերութիւն, դէպի օտար երկրներ: «Այնուհետեւ եկան Արտաշատ մեծ քաղաքը, նրան առան, պարիսպները կործանեցին, այնտեղ էլ պահուած դանձերը առան եւ ամբողջ քաղաքը գերի վարեցին: Արտաշատ քաղաքից գերի տարան ինը հազար տուն հրեայ եւ քառասուն հազար տուն հայ: Առնում էին Վաղարշապատ քաղաքն էլ, քանդում, բերում էին, հիմքից կործանում էին: Այս քաղաքից էլ գերի էին տանում տասնինը հազար տուն: Առան Նրուանդաշատ մեծ քաղաքն էլ, այստեղից դուրս բերին քսան հազար տուն հայ եւ երեսուն հազար տուն հրեայ, իսկ քաղաքը հիմնադատակ կործանեցին: Յետոյ առան Բագրեւանդի եւ Զարեհաւան քաղաքը, այստեղից էլ գերի վերցրին հինգ հազար տուն հայ եւ ութ հազար տուն հրեայ եւ քաղաքը հիմնաւեր

կործանեցին: Առան նաև Զարիշատ մեծ քաղաքը Ալիհուլիտ գաւառում, գերի վերցրին տասնչորս հազար տուն հրեայ եւ տասը հազար տուն հայ, եւ այն էլ հիմնադատակ կործանում էին: Առան նաև Վան ամուր քաղաքը, Տողբ (պէտք է կարդալ Տոսպ) գաւառում, կրակ տուին, այրեցին, հիմքերը քանդեցին, այնտեղից էլ դուրս բերին հինգ հազար տուն հայ եւ տասնութ հազար տուն հրեայ» (8): Այնուհետև Փաւստոսը նկարագրում է, թէ ինչպէս պարսիկները դուրս բերին գերիներ զանազան գաւառներից, կողմերից, եօթ գաւառներից, աշխարհներից, ժողովեցին բերին Նախիջևան քաղաքը, որը իրենց զորքերի զորաժողովի տեղն էր: Փաւստոսը մի այլ տեղ յիշատակում է, որ գերիներին տարան բնակեցրին Ասորեստանում, որ է Խուստան, ըստ Խորենացու տարան Ապահան: Թովմա Արծրունին նոյնպէս յիշատակում է, որ հինգ հազար հրեաներ, ութ հազար քրիստոնեաներ են տեղահանուել Վանից:

Եթէ իւրաքանչիւր ընտանիքը (ծուխ) հաշուելու լինենք 6-10 հոգի, իսկ հնում ընտանիքները փոքր չէին լինում, ապա պարզ կը դառնայ, որ պարսիկները միայն այս շրջանում, այսինքն՝ 360-70-ական թուականներին, երկրից քշել են ավելի քան 800 հազար հայեր: Ինչ խօսք, Փաւստոսի մօտ թուերի չափազանցութիւն կայ, սակայն չպէտք է մոռանալ, որ վկայութիւնը մասսայական տեղահանման մասին է, նոյնիսկ «պարսիկ պատմադրի մը վկայութեամբ, Շապուհի պաշտօնապէս հրատարակած հալածանքը քրիստոնէութեան դէմ մինչեւ 200.000 քրիստոնէից նահատակութեան պատճառ եղած էր» (9): Միանգամայն հասկանալի է, որ նման մասսայական տեղահանման նպատակը երկրի տնտեսական ուժի, պետական ու ռազմական հզօրութեան թուլացումն էր, որին հետպնդում էին մրցակից երկու պետութիւնները՝ Բիւզանդիան եւ Պարսկաստանը: Իրագործելով իրենց չարամիտ ծրագրերը, ժամանակի երկու հզօր տէրութիւնները 387 թ. Հայաստանը բաժանեցին երկու մասի: Պարսկաստանի տիրապետութեան տակ անցաւ Հայաստանի մեծ մասը (չորս-հինգերորդը) պահպանելով ձեւական անկախութիւնը, իսկ Բիւզանդիան տէր կանգնեց արեւմտեան մասին նոյնպէս, պահպանելով հայոց թագաւորութիւնը: Հասկանալի է, որ մի ժամանակ հաւասարի, դաշնակցի իրաւունքով օգտուող Հայաստանին, որը հասել էր ուժեղ պետականութեան, բարձր մշակոյթի, չէին կարող միանգամից զրկել պետականութիւնից, յատկապէս՝ թագաւորութիւնից: Այսպիսով, Արեւելքի հզօր տէրու-

8) Փ. Բիւզանդ, Հայոց Պատմութիւն, գլուխ ԾԾ., էջ 220-221:

9) Ա. Ալպոյանեան, Հ. Գ. Պ., Ա. հար., էջ 122:

թիւններից մէկը «Ասորաց թագաւոր», «թագաւորների թագաւոր»ի պետութիւն Հայաստանը, վերջնականապէս ծնկի եկաւ, բաժանուեց երկու մասի, երկու թագաւորութիւնների:

Սակայն այդ բաժանումը դեռ սկիզբն էր պետական, դիւանադիտական, ռազմական այն մութ ծրագրերի, որ դարեր շարունակ մշակուել էին հռոմէական, բիւզանդական, պարսկական կայսրերի եւ թագաւորների խորհուրդներում, ռազմական շտաբներում: Նուաճողները լաւ դիտէին, որ երկու թագաւորութիւնների պայմաններում, երկարամեայ պետականութեան փորձ, մեծաքանակ ազնուականութիւն եւ զինուորականութիւն ունեցող հսկայական երկրամասերում տարածուած Հայաստանը բոլոր դէպքերում կը փորձի օգտագործել առիթները՝ միաւորուելու եւ անկախութիւն հաստատելու համար: Եւ բիւզանդական նուաճողները շատ մեթոդիկ ու մտածուած աշխատում են իրականացնել իրենց նախորդների ծրագրերը, բաժանուած Հայաստանին զրկել նաեւ ենթակայ պետութեան իրաւունքներից, «Ապա յունաց եւ պարսից թագաւորների դեսպաններն ու պատգամաւորները, իրենց մեծ երեւակայութիւն ունեցան եւ երկու թագաւորները, յունաց եւ պարսից, իրար հետ խորհուրդ արին, համաձայնութեան եկան: Նրանք յարմար համարեցին նախ հայոց աշխարհը երկու բաժին անել իրենց մէջ: Նրանք ասում էին «Մեր երկուսի միջեւ ընկած է այս հզօր, հարուստ քաղաքաւորութիւնը (ընդգծումը իմն է - Վ. Հ.), լաւ կը լինի, որ այս միջոցով թուլացնենք ու խանդարենք այս թագաւորութիւնը: Նախ երկու մասի բաժանենք այս երկու Արշակունի թագաւորներով (10), որոնք նշանակեցինք, յետոյ կ'աշխատենք նրանց էլ կրմատել, ազատագրել եւ մեր ծառայութեան ենթարկել (ընդգծումն իմն է - Վ. Հ.), որպէսզի մեր մէջ չկարողանան գլուխ բարձրացնել» (11):

Որոշ շրջանից յետոյ, երկու ախոյեան պետութիւնները, պայմանաւորուածութեան համաձայն, հայոց աշխարհի իրաւունքները կրճատեցին (12), վարչական փոփոխութիւնների միջոցով

10) Խօսքը Մամուէլի մահից յետոյ Արշակ Գ.ի եւ Խոսրով Ա.ի մասին է:

11) Փ. Բիւզանդ, Հայոց Պատմութիւն, Դպր. Զ., գլ. Ա., էջ 298:

12) 391 թ. Իրք Արշակ Գ. մահացաւ, հռոմէացիք այլեւս բիւզանդական հատուածում նոր քաղաք չկարգեցին, իսկ պարսկական մասում հայոց քաղաքաւորութիւնը պահպանուեց մինչեւ 428 թուականը, մինչեւ վառմ Շապուհի մահից յետոյ Յակոբքս առաջինը հրաժարուեց Արտաշէսին յաջորդ գնացել եւ հայոց քաղաքը նշանակել եւ երկրի կառավարումը յանձնուեց Պարսկաստանի կազմից նշանակուած հայ եւ պարսիկ մարզպաններին:

առնահարեցին նախարարների տանուտիրական ժառանգական իրաւունքները (13), հարուստ ու բարգաւաճ Հայաստանը աղքատացրին: Չնայած ծայր առած բազմաթիւ ապստամբութիւններին, ժողովրդական ազատագրական պատերազմներին (14), յաղթանակներին ու պարտութիւններին, դաշինքներին ու պայմանադրերին, Հայաստանը դարձաւ նուաճող պետութիւնների ծառայութեանը ենթակայ բղկտուած մի երկիր:

Նուաճողների կողմից ձեռնարկուած վերակազմութիւնները հետապնդում էին ոչ միայն վարչական, ռազմական, անտեսական նպատակներ, այլեւ ձուլման: Մէկը միւսին յաջորդող օրէնքները պահանջում էին, որ հայերը բոլոր զէպքերում հետեւեն պարսկական եւ բիւզանդական սահմանումներին, օրէնքներին ու հրահանգներին: Սակայն այդ բոլորով չէին բաւարարւում պարսկա-բիւզանդական բռնակալները, նրանք մշակում էին շատ աւելի ահաւոր բխաններ ու ծրագրեր հայերի ոչնչացման: Այդ տեսակէտից բնորոշ է Մորիկ կայսրի նամակը Սոսրով Բ. Պաւլոսին: Հայ պատմագիրներից Սերէոսը պահել է այդ նամակի բովանդակութիւնը, որը ասում է. «Մի խոտոր ու անհնազանդ ազգ կայ մեր մէջ եւ պղտորում է, բայց արի — ասում է նա — ես իմը ժողովեմ եւ Թրակիայում դումարեմ, դու քոնը ժողովիր եւ հրամայիր արեւելք հանել: Եթէ նրանք մեռնեն, ապա կը մեռնեն մեր թշնամիները, եւ եթէ սպաննեն, մեր թշնամիներին կը սպաննեն, եւ մենք խաղաղութեամբ կ'ապրենք: Որովհետեւ, եթէ դրանք իրենց երկրում մնան, մենք հանգիստ չենք լինի» (15):

13) Նկատի ունեն՛ք պարսից արձումիւսում հայ նախարարների դիրքի իջեցումը, հարկային նոր սիւստմը, իսկ բիւզանդական մասում Չեմնն կայսրի (471-491 թթ.) հայ նախարարական տների ժառանգական իրաւունքների սահմանափակումը, Յուստինիանոս կայսրի (527-565 թթ.) ռազմական (529 թ.), վարչական, սնտեսական վերակազմութիւնները (536 թ.), որի համաձայն բիւզանդական Հայաստանը բաժանուեց 4 մասի՝ Աւաջիմ Հայք, Երկրորդ Հայք, Երրորդ Հայք եւ Զորբորդ Հայք, իսկ հայ նախարարութիւնները նոր ժառանգութեան օրէնքով տրոհուեցին:

14) Այս շրջանում Յշամաւորուեցին 450-451 թ. վարդաճանց պատերազմը, 461-484 թթ. վահան Մամիկոնեանի գլխաւորած եւ 571-572 թթ. կարմիր վարդաճի առաջնորդութեամբ համաժողովրդական ապստամբութիւնները:

15) Սերէոս, *Սերէոս Եպիսկոպոսի Պատմութիւն*, Երեւան 1939, էջ 49:

Մորիկի նամակը ցոյց է տալիս, որ՝

1. Բիւզանդացիք եւ պարսիկները թէեւ Հայաստանը ենթարկել են իրենց, սակայն Հայերը շատ չէին փոխուել եւ մնացել էին «խոտոր», այսինքն՝ անհնազանդ։ Անհնազանդութիւնը արտայայտուած էր պետութեան վերականգնման փորձերով, ցեղային ապստամբութիւններով, որ յաճախ կրկնուած էին Պարսկաստանում եւ Բիւզանդիային ենթակայ հողամասերում։

2. Պարսկական, բիւզանդական կառավարողներին շատ էին անհանգստացնում երկրի ներսում պահպանուող Հայ ռազմական ուժերը եւ զինուորականութիւնը, որի վրայ յենուած Հայ նախարարական տները Հայոց պետականութիւնը վերականգնելու փորձեր էին անում։

3. Չնայած զանգուածային տեղահանումներին, վարչական փոփոխութեանց, Հարկային ծանր քաղաքականութեան, Հայերը շարունակում էին մեծամասնութիւն կազմել բուն երկրում, որը եւ դժուարացնում էր ուղեղծուած քաղաքականութեան իրականացումը՝ երկրի պարսկացումն ու բիւզանդականացումը, այսինքն՝ Հաւատափոխումն ու ձուլումը։

4. Որքան զանդուածարար, որքան արագ Հայերը հեռացուէին իրենց բնաշխարհից, այնքան շուտ նրանք կը մոռանային Հայրենիքը, իրենց պետութիւնը։

5. Դեռ 6-րդ դարի վերջերին, այսինքն՝ Հայ պետականութեան վերացումից շուրջ երկու հարիւր տարի յետոյ, Հայերը նոր բարձրացող ժողովուրդների նման, շարունակում էին մնալ սպառնալից եւ վտանգաւոր ուժ Բիւզանդիայի համար։

Պատմական աղբիւրների վկայութիւնից երեւում է, որ բիւզանդացիք եւ պարսիկները շատ մտածուած ու խորամանկ ձեւերով էին Հայերին հեռացնում իրենց բնակավայրերից։ Կայսրութեան սահմաններից պաշտպանութեան, պահակազօրի, պատերազմների անուան տակ Հայ զինուորական միաւորումները քշում տանում էին հեռաւոր երկրներ։ Միաժամանակ Հայ նշանաւոր զինուորականներին սիրաշահելու, կաշառելու, նրանց դժգոհութիւնը մեղմելու, կայսրութեան կողմը դրաւելու եւ երկրից դուրս պահելու նպատակով նշանակում էին բարձր պաշտօնների, նոյնիսկ արչաւանքների, ռազմական մեծ գործողութիւնների ղեկավարներ, ընդհանուր հրամանատարներ։ Բիւզանդացիք բոլոր դէպքերում չէին մոռանում առանձնացնել հողեր, հողամասեր, նոյնիսկ երկրամասեր՝ ծառայութեան դիմաց Հայ զինուորականներին առատօրէն վարձատրելու, նոր հողերի հետ կապելու համար։

Կայսրերը Հայ ռազմական ուժերը օգտագործում էին կայսրութեան սահմանների պահպանման, յարձակուող ուժերի պատնէշման, նոր յարձակումների կազմակերպման, կայսերական պալատի պահպանման համար: Պրոկոպիոս Կեսարացին, որը ոչ միայն նշանաւոր պատմիչ էր, այլև իր ժամանակի պետական, վարչական գործերի լաւատեղեակ անձնաւորութիւն եւ Յուստինիանոսի պալատին մօտ կանդնած գործիչ, իր «Պատերազմների Մասին» գրքի վերջին մասում, որը «Գաղտնի Պատմութիւն» խորագիրն է կրում, դրում է. «Սկզբում պալատի պահպանութեան համար առանձնացուել էր երեք հազար հինգ հարիւրից ոչ պակաս ստրիատիոններ: Ի սկզբանէ անտի պետութիւնը սրանց վճարում էր շատ աւելի ոռճիկ, քան մնացած բոլոր (ստրիատիոններին): Անցեալում կայսրերը սրանց ընտրութեան ժամանակ նկատի ունէին մարդկանց արժանիքները եւ Հայերին էին սալիս նախապատուութիւնը: Բայց սկսած Զենոն կայսրից (ստրիատիոն) անունը սկսուեց տրուել վախկոտ եւ պատերազմի մասին բոլորովին դադափար չունեցող մարդկանց: Ժամանակի ընթացքում նոյն ստրուկները դրամով գնում էին Ստրիատիոտի կոչումը: Երբ թագաւորութիւնը Յուստինիանոսն ստացաւ, Յուստինիանոսը շատերին արժանացրեց այդ պատուին, նրանցից շատ դրամ շորթելով» (16): Պրոկոպիոսը իր աշխատութեան մէջ նոյնիսկ շատ մանրամասն ընտրադրում է այն 17 Հայ նշանաւոր զորավարներին (Արտաւան եւ Արշակ Արշակունիները, Ներսէս, Հրահատ, Սահակ եւ Ներսէս Կամսարականներ, Արտաւազդ, Համազասպ, եւ այլն), որոնք Յուստինիանոսի ժամանակ մեծ ծառայութիւններ են մատուցել Իտալիայում, Թրակիայում, կայսրութեան բոլոր նահանգներում՝ պաշտպանելով Բիւզանդիայի շահերը:

Պարսիկները, բիւզանդացիները փորձուած ու ճանաչում գտած զինուորականներին պաշտօնների նշանակելով իրենց բանակներում, չէին մոռանում նաեւ Հայ կռուող զինուորներին: Յաճախ Հայկական այրուձին ուղարկելով հեռաւոր երկրներ, ձախողեցնում էին ապստամբութեան եւ պետականութեան վերականգնման ամէն մի փորձ: Պատմիչների վկայութեամբ, Հայերը բիւզանդացիներին տալիս էին պատերազմական անփոխարինելի ձիաւոր եւ աղեղնաւոր մարտիկներ: Ինչպէս հաստատում է Պրոկոպիոս Կեսարացին, Յուստինիանոս կայսրի պահակազօրը ամբողջովին կազմուած է եղել Հայերից: Աւելի քան երկու դար Իտալիայում է գտնուել Հայկական երեք հեծելազօր գունդ: Յուստինիանոսի ժամանակ

բաղմաթիւ հայեր գրաւել են պետական եւ հրամանատարական բարձր պաշտօններ եւ կռուել բիւզանդացիներէ փառքի, պետականութեան հօրացման, նուաճած երկրների պահպանման համար:

Նշանաւոր բիւզանդագէտ Շարլ Դիլլը բաղմաթիւ աղբիւրների ուսումնասիրութեան հիման վրայ հաստատում է, որ ճնախաձեռնող հայ ազնուականութիւնը կամովին ծառայութեան էր մտնում բիւզանդական բանակում», Բիւզանդիան Հայաստանից ստացել է հրաշալի շատ զօրահրամանատարներ եւ դերագանց վարչական աշխատողներ:

Հայկական ծառու ունէին նոյնիսկ որոշ կայսրեր. Հերակլը՝ 7-րդ դարում, Լեոն Հայկազնը՝ 9-րդ դարում, Ռոմանոս Լիկոքենոսը եւ Յովհաննէս Չմշկիկը՝ 10-րդ դարում: Բիւզանդիան Հայաստանին է պարտական այդ ժամանակ իր հրաշալի զինուորների համար, որովհետեւ հայկական ջոկատները 10-րդ դարում համարւում էին բիւզանդական բանակի լաւագոյն զօրամասերը: Ուստի դժուար չէ հասկանալ, թէ ինչու կայսրութեան կառավարութիւնը երազում էր այդ բնակչութեանը, որն ամբողջովին գտնւում էր բիւզանդական ազդեցութեան տակ, իր հպատակը դարձնել:

«Յուստինիանոսը (527-565 թթ.), որ կայսրութեան պիտի տար իր ամենամեծ ծաւալը եւ ամենէն մեծ փառքը, գրում է Ալպոյաճեանը, իր գործունէութեան մէջ ունէր բաղմաթիւ նշանաւոր հայ զինուորականներ, որոնք այդ փառաւոր շրջանին գլխաւոր դէմքերը հանդիսացան... Ասոնց մէջ բարձրագոյնին կը կանգնի անփոխարինելի դէմքը Ներսէս հայ զօրավարին: Թէեւ հասակով կարճ է, ոչ յաղթանդամ կամ անձնագեղ, կանուխ ցուցուցած ըլլալով բարձր ձիւրքեր, սուր միտք, զօրեղ կամք եւ ժիր գործունէութիւն...» (17):

Ներսէսը ոչ միայն փայլուն զօրավար էր, այլեւ խոշոր պետական գործիչ: Նրան է վերաբերում հիւսիսային Իտալիայի մայրաքաղաք Միլանոյի հիմնադրումը, Վենետիկի եւ Միլանոյի միջաբեկեցիցիների եւ գրատան կառուցումը:

Բիւզանդական կայսրերը հայ զօրավարների հետ միասին, օտար երկրներում, երկար տարիներ պահում էին նաեւ հայկական միաւորումներ: Հայկական զօրամասեր են պահուել Սիկիլիայում, Կրետէ կղզում, Ափրիկէի հիւսիսային շրջաններում, Եգիպտոսում եւ այլ վայրերում: 778 թուականին, երբ բիւզանդական բանակները ռազմական գործողութիւններ սկսեցին խալիֆայութեան դէմ,

17) Ա. Ալպոյաճեան, Հ. Գ. Պ., Ա. հտք., էջ 165-166:

Բիւզանդիայի Փոքր-Ասիական հինգ զորամասերից չորսի հրամանատարները հայեր էին՝ Արտաւազդ Մամիկոնեան, Տաճատ Անձեւացի, Վարազդտիբոց Բազրատ եւ Գրիգոր Մուշեղիկ Մամիկոնեան։ Ջինուորականների հետ միասին հեռաւոր երկրներում ապրում էին նրանց ընտանիքները, բարեկամներն ու հարազատները, այդ շրջաններում հաւաքւում էին նաեւ հայ վաճառականներ, արհեստաւորներ, մտաւորականներ, առանձին շրջաններում գիւղացիական հոծ զանգուածներ եւ նորից սկիզբ է առնում հայ կեանքը։ Նոր բնակավայրերում կառուցւում էին հայկական վանքեր, եկեղեցիներ, վաճառատներ, բացւում ուսուցման եւ կրթութեան օճախներ, հայ համայնքը յարմարւում էր նոր երկրների եւ նոր ժողովուրդների կեանքին, մասնակցում տնտեսութեան զարգացմանն ու կառավարմանը, դառնում նոր երկրի մշտական բնակիչ, պաշտպանում նոր բնակավայրի շահերը եւ շատ դէպքերում մոռանում իր հայրենիքը։ «Անոնք ամէնն ալ զինուոր չէին կրնար ըլլալ։ Անոնց մէջ անշուշտ կային երկրագործներ, առեւտրականներ՝ փերեղակ կամ վաճառական, արհեստաւոր կամ բանուորներ, որոնք բացառիկ փայլով մը շողացող կայսրութեան մէջ պատեհութիւններ ունէին իրենց ձիրքերը եւ ընդունակութիւնները երեւան հանելու» (18)։

Ձնայած իր մասնատուածութեան, կրկնուող գաղթերի ու տեղահանումների զինուորական ու տնտեսական ուժերի քայքայման, դարեր շարունակ հայոց երկիրը պահպանում է իր զինուորականի ուժի, շինականի աշխատասիրութեան, արհեստաւորի վարպետութեան հռչակը։

«Հայ նախարարները, ազատականներն իրենց զօրականներով, հետեւողներով, շինականներով կու գային հաստատուելու Արմանեան եւ Անատոլիկ բնակավայրերուն հողերը։ Հայաստանն ամենէն արդիւնատու հողն էր զօրք հաւաքելու համար եւ ամենից քաջամարտիկ՝ տեսակէն» (19)։

Վասիլ առաջինի ժամանակ, երբ ճնշւում է Պաւլիկեանների սոցիալիստական հօր շարժումը, որն ուղղուած էր ե՛ւ ներքին, ե՛ւ օտար շահագործողների դէմ, տասնեակ հազարներով հայ գիւղացիներ տեղահանւում են իրենց բնակավայրերից եւ քշւում Պալքանները, նոյնը կրկնւում է թոնդրակեցիների շարժման ժամանակ՝ 9-11-րդ դարերում։

18) Ա. Ալպայաճեան, Հ. Գ. Պ., Ա. հտք., էջ 175։

19) Գ. Ֆեմուրճեան, Հայազգիներ եւ Բիւզանդիոն, «Հայաստանի Կոչմակ», 1935, էջ 354։

Բիւզանդիայի բռնազաղթի ձեւերից մէկն էլ ժողովուրդները մի բնակավայրից մի ուրիշ բնակավայր տեղափոխելն է եղել: Դժբանով կայսրութիւնը աշխատել է նուաճած երկրները ոչ միայն տնտեսապէս, այլև քաղաքականապէս թուլացնել: Ճինչպէս յայտնի է, — ասում է ուս բիւզանդագէտ Ա. Վասիլիւսը, — բիւզանդական պետութեան շատ սիրած միջոցառումներից մէկը, տարբեր ժողովուրդների մի շրջանից միւսը դաղթեցնելն է հանդիսացել, այսպէս օրինակ՝ սլաւոններին փոխադրելն է Փոքր Ասիա, իսկ հայերին Պալքանեան թերակղզին»:

Արտադաղթը մինչ Բագրատունիների թագաւորութեան անկումը, շատ աւելի զուսպ է եղել ու սահմանափակ: Այն շատ աւելի մեծ չափերի է հասել, երբ Հայաստանը վերջնականապէս կորցրել է իր քաղաքական անկախութիւնը: Բիւզանդացիների եւ սելճուքների հարուածների տակ, երբ ընկնում է հայոց մայրաքաղաք Անին, արտադաղթը շատ աւելի մեծ ծաւալ է ընդունում: Հայերի մի մասը, թողնելով հայրենի հողը, տունը, բնակութիւն է հաստատում հարեւան ժողովուրդների՝ վրացիների եւ աղուանների երկրներում, իսկ միւս մասը՝ չլում է շատ աւելի հեռաւոր եւ անծանօթ երկրներ, դէպի Հիւսիսային ու արեւմտեան տափաստանները:

Հայերին իրենց հողից հեռացնում էին ոչ միայն պարսիկներն ու արաբները, սելճուքներն ու մոնկոլները, այլև բիւզանդական հայազգի կայսրերը: Տեղահանումները կատարում էին ե՛ւ կամաւոր, ե՛ւ բռնի: Հայ իշխանական տների ժառանգները, նախարարները, մեծ ու փոքր հայ թագաւորները, փոխանակ միացեալ ուժերով օտար զաւթիչների դէմ պայքարելու, բռունցք կազմելու ամէն մի նոր յարձակում ետ վանելու համար, յուսալքուած թողնում, լքում էին հայրենի երկիրը, կամ վաճառում ժառանգութիւնը եւ բռնում օտար երկրների ճանապարհը, յանձնած սեփական հողերի, գիւղերի, քաղաքների եւ ապրանքների դիմաց նոր երկրներում ստանում հողակտորներ՝ իրենց ապրուստի, ապահով կեանքի եւ վայելքի համար: 11-րդ դարում Վասպուրականի Սենեքերիմ Արծրունին, Վասիլ Պուլկարասպանին յանձնելով ամբողջ Վասպուրականի 10 քաղաքները, 72 բերդերը, 1000-ից աւելի գիւղերը, փոխարէնը ստանում է Սերաստիա քաղաքը իր շրջապատով: Պահպանուած տեղեկութիւնների համաձայն, այս նոր շրջաններում արդէն բնակութիւն էին հաստատել շուրջ 400 հազար հայեր:

Պատմութեանը ծանօթ է, թէ ինչպէս բիւզանդացիք նենդութեամբ երիտասարդ Գազիկ թագաւորին կանչում են Պոլիս եւ 1044 թուին դրաւում հայոց վերջին մայրաքաղաք՝ տիեզերահռչակ Ա-

նին ու որպէս հատուցում հայոց թագաւորին «նուիրում» Կեսարիայում Պիզա քաղաքը: Յայտնի է, որ Կարսի թագաւորը ահաբեկուած նոր յարձակումներից, իր տէրութիւնը «յանձնում է» բիւզանդացիներին, փոխարէնը Կիլիկիան Տաւրոսի երկրամասում ստանում Մամուրալ քաղաքը: Միքայէլ Ասորին պատմում է, թէ ինչպէս Վասիլ կայսրի ժամանակ ծայր առաւ մեծ տեղահանումներ եւ ինքը՝ Վասիլ կայսրը Սենեքերիմի ձեռքից խլեց Վասպուրականը եւ փոխարէնը տուեց Սեբաստիան: Միքայէլ Ասորին նշում է, որ հայերը բազմացան այս շրջանում եւ այստեղից է, որ տարածուեցին Կապադովկիա, Կիլիկիա եւ Ասորիք:

Հայ պատմադիրները՝ Արիստակէս Լաստիվերտցին, Ոււհայեցին, Սամուէլ Անեցին, Կիրակոս Գանձակեցին, Թովմա Արծրունին, Վարդանը, Սմբատը նոյնպէս մանրամասն տեղեկութիւններ են յայտնում տեղահանումների վերաբերեալ եւ մեծ կսկիծով ու ցաւով պատմում բիւզանդացիների վայրագութիւնների ու նենգութիւնների մասին: Ֆրանսացի նշանաւոր բիւզանդագէտ Լորանը (Laurent) ուսումնասիրելով այդ շրջանի հայերի տեղահանումներն ու վերաբնակեցումը գրում է որ հայերը ապրում էին բիւզանդական կայսրութեան արեւելեան նահանգներում: Կազմում էին բնակչութեան գրեթէ ամբողջութիւնը Իբերիայի (Հիւսիսային Եփրատի հովիտ) եւ Միջագետքի (հարաւային Եփրատ) թեմերի (20):

11-րդ դարում կայսրութեան տիրապետութեան որոշ շրջաններ գրեթէ ամբողջութեամբ զուտ հայ երկրներ էին:

Հայերի կուտակումները եւ տեղափոխութիւնները այնքան լայն չափերի են հասնում բուն Հայաստանից դուրս, Տարսոն, Կապադովկիա, Միլիտենէ, Տաւրոս, Կեսարիա, Եդեսիա, որ նոր վայրերում կառավարման համար ստեղծուում էին հայկական իշխանութիւններ, իսկ շատ շրջանների բերդերի եւ ամրոցների պաշտպանութիւնը կայսրութիւնը ստիպուած է լինում յանձնել հայ զինուորականների եւ իշխանների: «Ոմանք, հոն հարստացան, եզան մեծ հողատէրեր - կալուածատէրեր, հրամայեցին բանակներու եւ գաւառներու, գլուխը անցան կայսերական կառավարութեան եւ նոյնիսկ բարձրացան, ոչ առանց փայլի, Պոլսոյ կայսերական գահը... բնակչութիւնը հոն այնքան մեծ չափով խառնուած էր հայերու հետ, որ այդ երկրամասին անունը դրուեցաւ Փոքր Հայք, յետոյ կառավարութիւն Արմենիակներու» (21): Նոր բարձրացող

20) Ա. Ալպոյաճեան, Հ. Գ. Պ., Ա. հտր., էջ 251:

21) Նոյնը, էջ 252:

Ֆէոտալական եւ իշխանական տները, օգտագործելով կայսրութեան թուրութիւնը, երբեմն ապստամբում էին, ստեղծում հայկական մեծ ու փոքր իշխանութիւններ եւ իրենց անկախ յայտարարում :

Այսպիսով, հայերը անկախ իրենց կամքից եւ ցանկութիւնից, զանգուածաբար հաստատում էին բիւզանդական լայնածաւալ պետութեան մէջ, Պալքաններում, Իտալիայում, Միջերկրականի ծովափնեայ երկրներում, հիմնում հայկական դաղութներ, դառնում նոր երկրների մշտական բնակիչներ, հասնում մեծ հարստութիւնների ու դիրքի, փառքի, առանձին դէպքերում ձեռք բերում իշխանութիւն, հասնում նոյնիսկ ինքնուրոյնութեան, սակայն բոլոր դէպքերում ճանաչում արդէն որպէս ծնկի եկած ենթակայ մի ժողովուրդ, որը զրկուած հայրենիքից եւ պետականութիւնից, դեռնում էր օտարութեան մէջ, միշտ ձուլման, դիմազեղծման եւ անհետացման սպառնալիքի տակ :

Դժբախտաբար, հետագայ դարերում հայերի տեղահանման, արտագաղթի եւ հայ դաղթավայրերի կազմաւորման ընթացքը կանգ չի առնում, այլ շարունակուում է դարեր շարունակ, դառնալով հայոց պատմութեան մշտական ուղեկիցը եւ նրա անբաժանելի մասը :

Եթէ հին դարերում օտար նուաճողները մասսայական տեղահանումների ճանապարհով ձգտում էին թուլացնել Հայաստանի ռազմական, տնտեսական ուժը, ապա միջին դարերում եւ նոր ժամանակներում, սելճուք թուրքերն ու օսմանցիները նպատակ էին դրել զրաւել եւ սեփականացնել ենթակայ ժողովուրդների հողերը :

Աւելի քան չորս դար պայքարից յետոյ թրքական պետութեանը՝ 20-րդ դարի սկզբի ցեղասպանների բանդային յաջողուեց իրականացնել սուլթանների բաղձանքը՝ հաթաղանի եւ տեղահանման միջոցով ամայացնել մի ամբողջ երկիր, որը հազարամեակներ շարունակ հայութեան բնօրրանն էր եղել : Կանգ առաւ ընդմիշտ երկրից արտագաղթը, սակայն այն նորից շարունակուեց արդէն նոր երկրներից, կազմելով ու վերակազմելով հայոց նոր ու նոր դաղթավայրեր :

Բերուած փաստերը անառարկելիօրէն հաստատում են, որ հայ դաղթավայրերը կազմակերպուել են շատ հին ժամանակներից : Հնագոյն դաղթավայրերից մէկը Բիւզանդիայի մայրաքաղաք Կոստանդնուպոլիսն է եղել, ուր հայերը հաստատուել ու ապրել են եւ միաժամանակ դոյատեւել աւելի քան 1500 տարի :

THE RISE AND DEVELOPMENT OF ARMENIAN COLONIES

VARTKES HAMAZASBIAN

The Armenian Diaspora has a very ancient history. Armenian and foreign sources already speak of its development in the early years of Armenia's existence and its continuance through the ages.

In this study the author first examines the formation of Armenian colonies during the Achaemenid period, the time of Alexander the Great, and up through the reign of King Tigranes the Great. Then the author discusses the formation of other colonies as a result of Sasanid and Byzantine policies towards the Armenians, stressing the role of the Armenians in the Byzantine Empire and the founding of totally new centers of Armenian life.